



দায়িত্ব শীলদের দৈনিক

দেশ রূপান্তর

১৮-১০-২০২৩, অনলাইন

ইন্সটিটিউট বিশ্ববিদ্যালয়ের নতুন ভিসি ড. শামস্ রহমান

অনলাইন ডেস্ক | ১৮ অক্টোবর, ২০২৩ ১৮:২২



অধ্যাপক ড. মোহাম্মদ ফরাসউদ্দিন নতুন উপাচার্য ড. শামস্ রহমানকে স্বাগত জানান

ইন্সটিটিউট বিশ্ববিদ্যালয়ের নতুন উপাচার্য (ভিসি) হিসেবে নিয়োগ পেয়েছেন অধ্যাপক ড. শামস্ রহমান। বিশ্ববিদ্যালয়ের আচার্য রাষ্ট্রপতি মো. সাহাবুদ্দিন চার বছরের জন্য তাকে উপাচার্য পদে নিয়োগ দিয়েছেন।

ড. শামস্ রহমান বিশ্ববিদ্যালয়ের ষষ্ঠ উপাচার্য হিসেবে দায়িত্ব পালন করবেন। বুধবার (১৮ অক্টোবর) ইন্সটিটিউট বিশ্ববিদ্যালয়ের প্রধান উপদেষ্টা ও প্রতিষ্ঠাতা উপাচার্য এবং বাংলাদেশ ব্যাংকের সাবেক গভর্নর অধ্যাপক ড. মোহাম্মদ ফরাসউদ্দিন রাজধানীর আফতাব নগরের নিজস্ব ক্যাম্পাসে নতুন উপাচার্যকে স্বাগত জানান।

ড. শামস্ রহমান ২০২১ এবং ২০২২ সালে পরপর দুই বার বিশ্বের শীর্ষস্থানীয় দুই শতাংশ স্কলারের একজন হিসেবে স্বীকৃতি লাভ করেন। বর্তমানে তিনি অস্ট্রেলিয়ার মেলবোর্নের আরএমআইটি বিশ্ববিদ্যালয়ের সাপ্লাই চেইন ম্যানেজমেন্ট বিভাগের একজন অধ্যাপক এবং এ বিষয়ে আন্তর্জাতিক পর্যায়ে একজন বিশেষজ্ঞ।

তার ২৫০টিরও বেশি গবেষণা নিবন্ধ আন্তর্জাতিকভাবে স্বীকৃত বিভিন্ন জার্নালে প্রকাশিত হয়েছে। তিনি 'ইন্টারন্যাশনাল জার্নাল অব ইনফরমেশন সিস্টেমস্ অ্যান্ড সাপ্লাই চেইন ম্যানেজমেন্ট'-এর এসোসিয়েট এডিটর। সেইসঙ্গে তিনি ১৫টি আন্তর্জাতিক জার্নালের এডিটোরিয়াল বোর্ডের সদস্য।

ড. শামস্ রহমান একাডেমিক ও গবেষণা কাজের স্বীকৃতি স্বরূপ দেশে-বিদেশে বিভিন্ন প্রতিষ্ঠান থেকে পুরস্কৃত হয়েছেন। তিনি অস্ট্রেলিয়ার সিডনি বিশ্ববিদ্যালয়সহ যুক্তরাজ্য এবং যুক্তরাষ্ট্রের একাধিক বিশ্ববিদ্যালয়ে অধ্যাপনা ও গবেষণার কাজে জড়িত ছিলেন।

শিক্ষাজীবনে ড. শামস্ রহমান কমনওয়েলথ স্কলারশিপের আওতায় যুক্তরাজ্যের ইউনিভার্সিটি অব এক্সেটার থেকে পিএইচডি ডিগ্রি অর্জন করেন। এছাড়া তিনি রেলারুশ ইন্সটিটিউট অব টেকনোলজি থেকে 'মাস্টার অব সায়েন্স ইন মেকানিক্যাল ইঞ্জিনিয়ারিং' এবং থাইল্যান্ডের এশিয়ান ইন্সটিটিউট অব টেকনোলজি (এআইটি) থেকে 'মাস্টার অব ইঞ্জিনিয়ারিং ইন ইন্ডাস্ট্রিয়াল ইঞ্জিনিয়ারিং অ্যান্ড ম্যানেজমেন্ট' ডিগ্রি অর্জন করেন। তিনি মির্জাপুর ক্যাডেট কলেজ থেকে এসএসসি এবং এইচএসসি সম্পন্ন করেছিলেন।